

Date – 16/01/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Lirngching na tak thlen thulha chhanchhuah leh chhawmdawl hna kalpui dan tur, a taka enchinna 'State Level Mock Exercise on Earthquake' chu nimin khan state pumah hlawhtling taka hman a ni.
2. Sorkarin ruang phurhna tur a ruahman chu awlsam zawka a mamawh ten an chhawr tangkai theih nan Ruang Phurh Online Portal hawn a ni.
3. Prime Minister Narendra Modia chuan khawvel chhimlam ram Global South te harsatna hi India chuan khawvel hriatah theihtawpin a puangzar tih a sawi.
4. Chhatisgarh ah Maoists 52 te security force kutah an inpe.

<><><>

STATE LEVEL MOCK EXERCISE

Lirngching na tak thlen thulha chhanchhuah leh chhawmdawl hna kalpui dan tur, a taka enchinna 'State Level Mock Exercise on Earthquake' chu nimin khan state pumah hlawhtling taka hman a ni.

SFX

He hun hi National Disaster Management Authority leh Disaster Management & Rehabilitation Department bultumin Mizoram district tinah kalpui a ni.

Nizan khan 'State Level Mock Exercise On Earthquake' thlirletna meeting chu Assembly Secretariat Annexe Conference Hall-ah neih a ni a. He thutkhawm hi DM&R Minister Prof. Lalnilawma chuan a hmanpui.

Minister Prof. Lalnilawma chuan Mizoram pum huapa lirngching avanga chhiatna a lo thlen thulha chet lak dan tur enchinna hlawhtling taka buatsaih a ni chu lawmawm a tih thu a sawi a. Mizoram sawrkar hnuaiia Department hrang hrangte, sawrkar laipui hnuaiia agency hrang hrangte leh tlawmngai pawlte kara thawhhona tha a awm avanga mock exercise hlawhtling taka neih a ni, a ti a. Bureau of Indian Standard (BIS) in Seismic zonation a tihchhuah thar berah India Hmarchhak pum chu Zone 6-ah a awm avangin lirngching a lo thlen thulha chet lak dan tur inzir leh enchin chu thil pawimawh tak a nih thu a sawi a.

Minister chuan hetiang hmalakna-a state dang nena thawhho a khat thu tarlangin, Kolasib district mock exercise-ah Assam State Disaster Response Force an rawn tel thei chu lawmawm a tih thu a sawi a. Khuarel chhiatna thleng thei hriatlawkna (Early Warning Sytem) neih ve pawimawh a tih thu tarlangin, chhanchhuah leh chhawmdawl hna thawhna tura hmanrua kan neih sate bakah a aia tha lehzual zawkte pawh neih belh ni se a tih thu a sawi bawk a ni.

District tina DDMA-ten Video Conference-in meeting hi an lo chhim ve a, DDMA Chairman-te leh district tina head observer-ten vawiina Mock Exercise an

kalpui dan leh Mock Exercise atanga an thil zirchhuah leh hmasawna ngaihna lai leh rawtna an neihte report an pe a, Brig. Ravinder Gurung pawhin thusawiin, Mock Exercise-a tel zawng zawngten tihtakzeta an mawhphurhna an hlen chu lawmawm a tih thu a sawi a. Mock Exercise tha leh hlawhtling ber pawl a nih thu tarlangin, sawrkar laipui hnuaiia agency hrang hrangte, Department hrang hrangte leh tlawmngai pawlte zingah thawhhona tha tak a hmuh thu a sawi a. Mizorama khuarel chhiatna thleng thei zinga hlauhawm ber chu lirnghing a nih thu sawiin, NDMA-in Mock Exercise pawimawh tak a huaihawt chu lawmawm a tih thu a sawi a ni.

Nimin khan Lirnghing avangin Mizoram district hrang hranga hmun 36-ah inchim, kangmei chhuak leh chhiatna hrang hrang thlen theih dan lem chan a ni a. Heng hmunahnte hian District Emergency Operation Centre-te, Incident Site Commander-te, Staging Area Management leh Relief Camp-a hmalaknate chu Video Conference kaltlangin vilpui a ni a.

NDMA Sr. Consultant Brig. (Retd) Ravinder Gurung an State Emergency Operation Centre atangin heng chetlaknate hi thlirpuiin Pu PC Lallawmsanga, IPS (Retd.), DM & R Principal Secretary hlui leh Pu Dominic Lalhmangaiha, DM & R Director hlui te chuan State Observer angin an telpui bawk a ni.

State Level Mock Exercise on Earthquake hi chawhma dar 10 atang khan tih chhinna hi kalpui tan a ni a. District tin a Quick Response Force-te, Fire & Emergency services -te, National Disaster Response Force, State Disaster Response Force, Assam leh Tripura atangin Central Industrial Security Force (CISF), Assam Rifles, Border Security Force (BSF), Medical team, tlawmngai pawl leh volunteer-te mawhphurhna ataka an kalpui dan enchhin a ni a. Lirnghing vanga In chim, kangmei chhuak, kawng ping, inbiakpawhna chhia thleng thei kara chhanchhuah leh chhawmdawl hna awmze nei taka kalpui dan tih chhinna ah hian Line Department hrang hrang, PHE, PWD, P&E, Transport Department, I&PR leh a dangte pawh an tel a. Hliam enkawlina hmun 'Relief Camp' te hi a hmunah NDMA leh DM&R hotute hian an tlawh bawk a ni.

Khaw thim hnuah chhanchhuah leh chhawmdawl hna kalpui kawngah harsatna a awm leh awm loh hriat a nih theih nan State Level Mock Exercise hi tlai dar 5 ah an kalpui leh nghal a ni.

<><><>

LUNGLEI KAWMZAWL

Lunglei Kawmzawl-a Territorial Army ALPHA Coy Officer Commanding Lt Col Prashant R.Kakade Officer Comanding hovin Lungleia Southern Flower School naupang te chu nimin khan Drone nih phung leh ram venhim nan leh Indo nan a hman anih dan an hrihfiyah.

TA hotu te chuan tunlai khawvelah Drones chu tangkai takin Sipai ten an hmang a, mihring Chuang lova van boruak a raldona leh hmelma te beihna ber a ni tawh an ti.

Zirlai te chu video te entirin a tak ngei a drone an hman tangkai dan te entir an ni a, tunlai technology hmelhriattir a, ngampa taka an hmanthiam chu an tum ber pakhat a ni.

Heibakah zirlaite chu an hun lo kal zel tur atan flying experience neih tir chu an tum a TA te hian zirlaite hi hun remchangah Drone khalh tir chhin an tum tih an sawi a ni.

School Principal chuan Lt Col Prashant R Kakade leh a team ten advanced technological education an zirlai te an pe chu lawmawm a tih thu a sawi a, heibakah adrone education chu school curriculum ah tel se tha a tih thu a sawi.

Lt Col Prashant R Kakade pawhin drone nih phung an in zirtir hian Naupang te rilru a chawhphur ngei a beisei thu a sawi.

Kan corr sawi danin, Tunah hian sikul engemawzat chuan Drone Lab hi tlawh a, a nihdan phung zir turin an in kau mek a, Territorial Army te pawh an in hawng hle a ni.



RUANG PHURH ONLINE

Sorkarin ruang phurhna tur a ruahman chu awlsam zawka a mamawh ten an chhawr tangkai theih nan internet kaltlanga dawrna tur Ruang Phurh Online Portal nimin khan Social Welfare Minister Pi Lalrinpuin a hawng.

Pi Lalrinpuin chuan ruang phurhna tura ruahmanna siam hi sorkarna an siam hma pawh a an lo ngaih pawimawh tawh manifesto a an neih tih hlawhtlinna a ni tih sawiin, ruang phurh scheme tluang taka hmasawn zawnga kalpui theih a ni ta chu lawmawm a ti a, MSeGS te nen tha taka an thawhho avanga lawmthu sawiin, portal hi hmang tangkai turin mi zawng zawng a sawm a, tihchangtlun zel a nih tur thu a sawi bawk.

Ruang phurh online portal hi google play leh app store atanga download theih niin, vawiin ni thlenga ruangphurhna application lut tawh zat hi 1680 a ni a, cheng nuai 175 sing 8 sang 5 pek chhuah tawh a ni.

Social Welfare department hotute atanga Akashvani News Aizawl thudawn danin, ruang phurhna senso sorkarin a tumsakna hi kum 2024 September thla khan hawn a ni a, hemi kum vek December thla atangin ruang phurh man hi pek tan a ni.

Mizoram sorkar chuan ruang phurhna senso tur hi kum 2024-25 leh 2025-26 atan budget-ah cheng nuai 500 ve ve a dah a; ruang phurh inkaihhraina in a tarlan danin, ruang phurh tur chu a thlenna tur km. 20 aia hnai a ni tur a ni lo a, km. 20 piah lamah chuan tu tan pawh hman theih niin, lirthei thlen theih chin a huam a ni.

Inkaihhraina ang chuan, ruang phurhna lirthei hman man chu State Transport Authority in rate a siam anga kalpui a ni a, ruang phurhna man sorkarin a peksak hian lirthei pakhat chiah a huam a, Ruang phurhna hlat zawng chhût nan ruang chhuahna atanga a dahna hmun inkar hlat zawng lâk tur a ni a; lirthei thlen lohna khua a nih chuan lirthei thlen theih tàwpna thleng a ni. Ruang phurhna chu kawng tawi thei ber hman tur a ni bawk.



CM

Chief Minister Pu Lalduhoma an thalai te chu kuthnathawk turin a sawm.

Nimin khan Chief Minister hian Aizawl Vanapa Hall-ah Farmers Training on Scientific Rubber Cultivation, Harvesting Techniques, Post-Harvest Handling and Pest Management chu a hawng a, thusawiin Pu Lalduhoma chuan, Mizoram chuan a thlai thar chhuah te hmangin ram dang mite hriat a hlawh chho mek a ti a, Rubber chu hun rei tak daih, a chingtu mai bakah an fate tana in rochun theih eizawna a nih avangin a tha tih a sawi.

Mizoram Rubber Society (MIRSO) buatsaih hun a hman puinaah Chief Minister Pu Lalduhoma chuan, Mizo te chu tun hma atanga kut hnathawk nasa ni mah se hriat hlawhna khawp thar chhuah a awm ngai meuh lo niin a sawi a, tunah chuan Sawhthing hmangin hriat a hlawh ta a, Sapthei pawhin hriat a hlawh chho tan tih sawiin, a dawttu chu Rubber nei thei turah an beisei tih a sawi a. Rubber chuan ramngaw a ti chereu ngawt lo a, ramngaw a siam bakah leilung luangral tur a vengin tuihna pawh ti pung thei tura ngaih a ni a ti a. Mizorama Rubber chin theihna tur hmun tha zau tak awm chu a chingtu lamin an la hnawhkhat zo lo hle niin a sawi bawk.

He hun hmanpuitu Land Resources, Soil & Water Conservation Minister Pu Lalthansanga pawhin thu sawiin sum an hmuh theih nan NABARD, SASCI leh Bana Kaih atangin an lakhawm a, kuthnathawk tuten an hlawntlin pui ngei theih nan theihtawp an chhuah tih a sawi bawk.

MIRSO te hian Chief Minister Pu Lalduhoma, Minister Lalthansanga, Rubber Board Development Officer Chiranjib Banik, Pu B. Lalthazuala leh Chungklang Rubber Cluster te hnenah chawimawina an hlan nghal bawk.

Chawhnu lamah Rubber chingtuten an thlai chin dan chungchang leh hma an sawn theih dan turah training an nei a, hemi kawnga mi thiam ten zirtirna an pe a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan khawvel chhimlam ram Global South te harsatna hi India chuan khawvel hriatah theihtawpin a puangzar tih a sawi.

Nimina New Delhi-a Samvidhan Sadan-a Conference of Speakers and Presiding Officers of the Commonwealth ah he thu hi sawiin Pu Modia chuan G20 President anih chung pawhin India chuan Global South te a ngaipawimawh hle a, khawvel ram inhmukhawmah vawi tam tak a sawi chhuak a ni a ti.

Prime Minister Narendra Modia chuan mipui rorelna rama bung hrang pawimawh leh kalphung tha taka neihin mipui rorelna nghet leh tha thlen thei tih India-in a lantir a ti. Pu Modia chuan India chuan ramchhunga hnam leh ze hrang hrang awm chu democracy chakna a tan a hmang a ti a. India ramah chuan democracy chu mipui kilkhawr ber hnenah pawh thliarbikna awmloa rorelna tha pek anih thu a sawi a. Kum kalta chung reilote ah khan ramchhunga mi rethei vaibelchhe 25 chu retheihna ata chhanchhuah an ni tawh tih a sawi a. Mipuite chu dah pawimawh hmasak ber an nih thu sawiin mipuite mamawh chu sawrkarin a ngai pawimawh hmasa ber thin a ti bawk.

<><><>

MEA ON IRAN

Chhatisgarh ah Maoitsts 52 te security force kutah an inpe. Nimin khan Bijapur district-ah security force te hmaah Maoist helte hi an inpe a. Maoist hel inpe te hi an lu man belkhawm cheng vaibelchhe 1 leh nuai 45 a tling a. An zingah hian hmeichhia 21 an tel a ni.

